

*NONVM, Capitis & caudae magnitudinem quanta in ipso Caelo per serenitatem extitit, mensurabit.*

*Atque his novem Capitibus prior pars finem imponet iis, quae e propriis considerationibus circa Cometam hanc proponenda censuimus.*

*DECIMUM vero & Vltimum Caput, quo unico totam posteriorem Libri partem (ut dixi) comprehendo, circa aliorum quotquot habere licuit Sententias discutiendas occupabitur, & ob aliquantam prolixitatem in duo subdividetur membra. Quorum anteriore, de eorum inuentionibus & placitis, qui Cometam hunc Aethereum & Superlunarem fuisse rectissime nobiscum senserunt, tractabimus Posteriore vero illorum, qui contrarium statuentes Elementari Mundo illum attribuerunt, opinationes diluemus.*

*Hanc autem Secunda Partis disputationem non eam ob causam instituimus, quod ullius honori vel existimationi quicquam, sicubi absona dixerit, detractum velimus (Id enim minus ingenuum & a sinceritate Mathematica alienum) sed solummodo omnia inuicem & cum ipsissima Veritate, tanquam ad Lydium lapidem probantes, expendere voluimus ita ut vel ipsis Autoribus arbitraris certitudinem penitiorum inquirendi, errorumque obstantium impedimenta semouendi studio hanc operam a nobis sumptam, concessum iri speremus.*

*Hae breuiter enumerata sunt, quibus Liber noster Secundus constabit. Confidimus autem nos huius cognitionis cupidis & intelligentibus ita in his satisfecisse adeoque dilucidis & inuictis Apodixibus rem omnem comprobasse, ut nullus hesitationi vel contradictioni (modo dextre & sine prauiudicio, veluti Mathematicos decet verum dignoscere amplectique velint) relinquatur locus: Sed potius error omnis, quem tot seculis peperit Autoritati & plausibilibus Peripateticorum argutiis vulgariter Philosophantium innixa opinio, ab intemerata Veritatis Schola vel tandem aliquando faceffat.*

SEQUITVR

PRIMA PARS.

CAPVT